




Sektor za ljudska prava- Сектор за људска права

Broj: 07-07-4638/11
Sarajevo, 22.11.2011. godine



Bosna i Hercegovina
Predstavničkom domu
Parlamentarne skupštine Bosne i Hercegovine

Službi Predstavničkog doma
Vaš akt broj: 01/a-50-1-15-13/11
od 15.11.2011. godine

Predmet: Obavijest po aktu službe Predstavničkog doma Parlamentarne skupštine
BiH, poslaničko pitanje poslanika Slavka Jovičića

Poštovani,

Obavještavamo Vas da smo dana 17.11.2011. godine, zaprimili akt – Poslanička pitanja, broj: 01/a-50-1-15-13/11 od 15.11.2011. godine, kojim nas obavještavate da je na 13. sjednici Predstavničkog doma Parlamentarne skupštine Bosne i Hercegovine održanoj 10. novembra 2011. godine poslanik Slavko Jovičić postavio tri pitanja.

Treće postavljeno pitanje glasi: "Predstavnički dom zadužuje Ministarstvo sigurnosti, Ministarstvo pravde i Ministarstvo za ljudska prava i izbjeglice da pokrenu sve zakonske i druge mehanizme kako bi se uspostavila potpuna kontrola i neometan pristup svim licima u Maoči i na tom području. Dakle, 24 sata dnevno kao što je na svim ostalim dijelovima BiH".

Ministarstvo za ljudska prava i izbjeglice nema nadležnost da osigurava slobodu kretanja u Bosni i Hercegovini odnosno osigura prikupljanje i korištenje podataka od značaja za sigurnost Bosne i Hercegovine, obzirom da je za navedena pitanja nadležno Ministarstvo sigurnosti BiH.

S poštovanjem,

CO: - Naslovu,
- Ministarstvu sigurnosti,
- a/a.





BOSNA I HERCEGOVINA
VIJEĆE MINISTARA
Generalno tajništvo

Broj: 05-50-1-2316/11
Sarajevo, 22.12.2011. godine

01/0-50-1
22-12-2011
ly

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 22-12-2011			
Organizaciona jedinica	Klasifikaciona oznaka	Redni broj	Broj priloga
01-	50-1-	15-	13/M

PARLAMENTARNA SKUPŠTINA BiH

- Zastupnički dom -

SARAJEVO

PREDMET: Odgovor na zastupničko pitanje – dostavlja se

Vijeće ministara Bosne i Hercegovine, na 169. sjednici održanoj 21.12.2011. godine, utvrdilo je Odgovor na pitanje koji je postavio Slavko Jovičić, zastupnik u Zastupničkom domu Parlamentarne skupštine Bosne i Hercegovine.

U prilogu prosljeđujemo Odgovor radi njegovog dostavljanja zastupniku.

S poštovanjem,



GENERALNI TAJNIK
Zvonimir Kutleša



**BOSNA I HERCEGOVINA
VIJEĆE MINISTARA**

Broj: 05-50-1-2316/11
Sarajevo, 21.12.2011. godine

Slavko Jovičić, poslanik u Predstavničkom domu Parlamentarne skupštine Bosne i Hercegovine, na 13. sjednici Predstavničkog doma, održanoj dana 10.11.2011. godine, postavio je sljedeće poslaničko pitanje:

„Predstavnički dom zadužuje Savjet ministara BiH da u parlamentarnu proceduru uputi izmjene i dopune Krivičnog zakona BiH kojima se predviđaju maksimalno moguće kazne za krivična djela terorizam, trgovina oružjem, trgovina bijelim robljem i narkoticima.“

Na postavljeno poslaničko pitanje, Vijeće ministara Bosne i Hercegovine, u smislu člana 37. Zakona o Vijeću ministara Bosne i Hercegovine (« Službeni glasnik BiH», broj: 38/02, 42/03, 81/06, 76/07, 81/07, 94/07 i 24/08.), na 169. sjednici, održanoj dana 21.12.2011. godine, utvrdilo je sledeći

ODGOVOR

Krivični zakon Bosne i Hercegovine (u daljem tekstu: Zakon) stupio je na snagu 01. marta 2003. godine. Od stupanja na snagu do danas Zakon je nekoliko puta mijenjan i dopunjavao. Posljednje izmjene i dopune usvojila je Parlamentarna skupština Bosne i Hercegovine u januaru 2010. godine, (Zakon o izmjenama i dopunama Krivičnog zakona Bosne i Hercegovine objavljen u «Službenom glasniku BiH», broj: 8/10). Ovim zakonom izvršene su izmjene i dopune velikog broja odredaba, pa i odredabe koje se odnose na krivična djela iz poslaničkog pitanja („terorizam, trgovina oružjem, trgovina bijelim robljem i narkoticima“). Zbog težine ove vrste krivičnih djela, navedenim izmjenama i dopunama je uglavnom izvršeno pooštavanje kazni, te su izvršene i druge potrebne izmjene.

Kao prvo potrebno je naglasiti da Zakon u svom općem dijelu propisuje da kazna zatvora ne može biti kraća od 30 dana ni duža od 20 godina, te da se za najteže oblike teških krivičnih djela počinjenih s umišljajem može propisati kazna dugotrajnog zatvora u trajanju od 21 do 45 godina. Ovim su određene granice u okviru kojih se mogu u posebnom dijelu zakona propisati kazne za pojedina krivična djela, te se ovako određeni opći okviri kazne zatvora ne mogu napuštati ni pri odmjeravanju kazne, bez obzira o kakvim krivičnim djelima je riječ.

Imajući u vidu naprijed navedeno, izmjenama Zakona iz 2010. godine, za krivično djelo „Terorizam“ iz člana 201. izvršeno je povećanje donjeg minimuma kazne sa tri na pet godina zatvora za osnovni oblik djela, te sa pet na osam godina zatvora za kvalifikovani oblik djela (ako

je usljed krivičnog djela iz stava 1. nastupila smrt jedne ili više osoba). Gornji maksimum kazne za ovo krivično djelo nije određen. Obzirom da je opći maksimum kazne zatvora određen u Zakonu u trajanju od dvadeset godina, za ovo krivično djelo moguće je izreći kaznu zatvora i od dvadeset godina. Iz navedenog je vidljivo da se za krivično djelo terorizma kao najmanja kazna može izreći kazna zatvora od pet godina, a kao najveća može se izreći i kazna zatvora od dvadeset godina. Izvršeno je pooštavanje kazne i za krivično djelo „Finansiranje terorističkih aktivnosti“ iz člana 202., gdje je umjesto kazne od jedne do deset godina zatvora, predviđen donji minimum kazne od tri godine, što znači da se može izreći kazna i od dvadeset godina zatvora. Osim postojećih krivična djela terorizma, uvrštena su i nova krivična djela koja su u vezi sa terorizmom („Javno podsticanje na terorističke aktivnosti, Vrbovanje radi terorističkih aktivnosti i Obuka za izvođenje terorističkih aktivnosti“), kod kojih je određen donji minimum kazne od tri godine, a gornji maksimum nije određen, pa je moguće izricanje i najveće propisane kazne zatvora od dvadeset godina.

Za krivično djelo „Neovlašten promet oružjem i vojnom opremom“, te proizvodima dvojne upotrebe iz člana 193. Zakona, ranija kazna od jedne do deset godina zamijenjena je kaznom od najmanje tri godine zatvora, pa je moguće za ovo krivično djelo izreći i kaznu zatvora od dvadeset godina.

Član 186. „Trgovina ljudima“ je potpuno izmijenjen, te je i za ovo krivično djelo ranija kazna od jedne do deset godina zamijenjena kaznom od najmanje tri godine zatvora za osnovni oblik djela, a za kvalifikovane oblike djela iz stava (2) i (3) (ako je djelo učinjeno prema osobi mlađoj od 18 godina i ako je djelo izvršilo službeno lice prilikom obavljanja službene dužnosti), predviđena je kazna zatvora od najmanje pet godina, dakle za ovo krivično djelo može se izreći kazna zatvora od dvadeset godina.

Kod krivičnog djela „Neovlašteni promet opojnim drogama“ iz člana 195., ranija kazna od jedne do deset godina zamijenjena je kaznom od najmanje tri godine zatvora, tako da je i kod ovog djela moguće izreći kaznu zatvora od dvadeset godina.

Imajući u vidu da je kod svih ovih djela određen samo donji minimum kazne, a da gornji maksimum kazne nije određen, sudu je ostavljena mogućnost da u svakom pojedinom slučaju cijeni koju će kaznu izreći, krećući se u okviru donjeg minimuma propisane kazne za to krivično djelo i Zakonom određenog općeg maksimuma kazne.



BOSNA I HERCEGOVINA
VIJEĆE MINISTARA
Generalno tajništvo

Broj: 05-50-1-2316/11
Sarajevo, 27.2.2012. godine

01-50-1
29-02-2012
B

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 29-02-2012			
Organizaciona jedinica	Klasifikaciona oznaka	Redni broj	Broj priloga
01-50-1-15-		15/11	

PARLAMENTARNA SKUPŠTINA BiH

- Zastupnički dom -

SARAJEVO

PREDMET: Odgovor na zastupničko pitanje – dostavlja se

Vijeće ministara Bosne i Hercegovine, na 2. sjednici održanoj 23.2.2012. godine, utvrdilo je Odgovor na pitanje koje je postavio Slavko Jovičić, zastupnik u Zastupničkom domu Parlamentarne skupštine Bosne i Hercegovine.

U privitku prosljeđujemo Odgovor radi njegovog dostavljanja zastupniku.

S poštovanjem,


GENERALNI TAJNIK
Zvonimir Kutleša



**BOSNA I HERCEGOVINA
VIJEĆE MINISTARA**

Broj: 05-50-1-2316/11
Sarajevo, 23.2.2012. godine

SLAVKO JOVIČIĆ, poslanik u Predstavničkom domu Parlamentarne skupštine Bosne i Hercegovine, na 13. sjednici Predstavničkog doma održanoj 10. novembra 2011.godine, postavio je Ministarstvu sigurnosti BiH pitanja sljedećeg sadržaja:

1. „Zadužuje se Ministarstvo bezbjednosti BiH da odmah počne sa procedurama protjerivanja svih lica koja nisu na redovan i uobičajen način stekla državljanstvo BiH sa teritorije BiH. Takođe predlažem ovom Domu da održi raspravu na temu konačnih rezultata vezanih za spisak naturalizovanih državljana BiH i rezultatima rada Komisije za reviziju tih državljanstava.

2. Predstavnički dom zadužuje Ministarstvo bezbjednosti, Ministarstvo pravde i Ministarstvo za ljudska prava i izbjeglice da pokrenu sve zakonske i druge mehanizme kako bi se uspostavila potpuna kontrola i neometan pristup svim licima u Maoči i na tom području. Dakle, 24 sata dnevno kao što je na svim ostalim djelovima BiH.“

Na postavljeno pitanje, Vijeće ministara Bosne i Hercegovine je na 2. sjednici održanoj 23. 2. 2012. godine, utvrdilo sljedeći

ODGOVOR

Ministarstvo sigurnosti Bosne i Hercegovine je na postavljena poslanička pitanja zatražilo odgovore od Službe za poslove sa strancima BiH, Granične policije BiH, Policije Brčko Distrikta BiH i Federalnog ministarstva unutrašnjih poslova, čije odgovore prenosimo u cijelosti:

1. Služba za poslove sa strancima BiH nakon poništenja i oduzimanja državljanstava BiH od strane Državne komisije za reviziju odluka o naturalizaciji stranih državljana u BiH za 665 osoba, je saopćenjem za javnost pozvala sve osobe kojima je oduzeto državljanstvo BiH i koje su tom odlukom postale strani državljani, da se jave u najbliže Terenske centre Službe za poslove sa strancima, kako bi u skladu sa Zakonom o kretanju i boravku stranaca i azilu regulirali svoj dalji status. Terenskim centrima se odazvao određeni broj stranih državljana kojim je oduzeto državljanstvo Bosne i Hercegovine.

Tom prilikom su upoznati sa mogućnošću reguliranja svoga statusa u skladu sa Zakonom, kao i daljeg ostanka u Bosni i Hercegovini.

Služba za poslove sa strancima BiH je od Državne komisije za reviziju odluka o naturalizaciji stranih državljana u BiH periodično dobivala rješenja o oduzimanju državljanstava BiH predmetnim osobama ali nisu dostavljane adrese boravka tih osoba kako bi se mogle provoditi dalje mjere iz nadležnosti Službe. Nakon zaprimanja rješenja o oduzimanju državljanstava, Služba je odmah od MUP-ova entiteta, kantona i Policije Brčko Distrikta tražila provjere adresa boravka pomenutih osoba kroz evidencije prijave prebivališta, te nakon dostavljenih rezultata provjera napravila analizu stanja i spisak osoba sa svim raspoloživim saznanjima radi koordinacije daljih aktivnosti.

Inspektori za strance su vršili operativne provjere na raspoloživim adresama u cilju pronalaženja osoba kojima je oduzeto državljanstvo BiH, te kontinuirano prikupljali operativna saznanja o njihovim mogućim kretanjima. Služba je također spisak osoba sa svim raspoloživim saznanjima dostavila OSA-i, SIPA-i Graničnoj policiji BiH, entitetskim i kantonalnim MUP-ovima, te Policiji Brčko Distrikta sa napomenom da ukoliko budu raspolagali saznanjima o kretanju ili boravku tih osoba u BiH, odmah obavijeste Službu radi preduzimanje neophodnih zakonskih mjera i nadležnosti.

Od ukupnog broja osoba kojima je oduzeto državljanstvo BiH inspektori su utvrdili da su 2 osobe umrle prirodnom smrću u Bosni i Hercegovini, dok je na teritoriji BiH ukupno pronađena 21 osoba, te su prema njima preduzete sljedeće mjere:

- Za 6 osoba izrečene su mjere protjerivanja sa zabranom povratka zbog kriminalnih aktivnosti i iste su udaljene sa teritorije BiH (Alžir 3, Bahrein 1, Irak 1, Jordan 1),
- Za 4 osobe izrečene su mjere protjerivanja sa zabranom povratka zbog prijetnje nacionalnoj sigurnosti BiH i iste su udaljene sa teritorije BiH (Alžir, Bahrein, Irak, Jordan),
- U Imigracionom centru Službe za poslove sa strancima BiH trenutno je pod nadzorom smješteno 5 osoba iz ove kategorije koje predstavljaju prijetnju nacionalnoj sigurnosti BiH (Alžir 2, Tunis, Sirija, Irak),
- Sud Bosne i Hercegovine je 1 osobi koja predstavlja prijetnju odredio blažu mjeru nadzora na adresi stanovanja (Irak),
- Odobren je privremeni boravak za 3 osobe za koje je utvrđeno da ne predstavljaju prijetnju nacionalnoj sigurnosti (Saudijska Arabija, Alžir, Maroko),
- Presudom Suda Bosne i Hercegovine vraćeno je državljanstvo za 2 osobe (Sirija, Alžir).

Obzirom da neke osobe smještene pod nadzor imaju privremene mjere, koje trenutno onemogućavaju njihovo udaljavanje, Služba za poslove sa strancima BiH će nakon što se steknu neophodni uvjeti ove osobe udaljiti sa teritorije BiH. Prema raspoloživim saznanjima Službe kao i sigurnosnih agencija u BiH, ostale osobe kojima je oduzeto državljanstvo BiH **ne nalaze se na teritoriji Bosne i Hercegovine.**

Granična policija Bosne i Hercegovine, je postupajući po aktu Državne komisije za reviziju odluka o naturalizaciji stranih državljana u Bosni i Hercegovini, kao i po aktima Sektora za državljanstvo i putne isprave Ministarstva civilnih poslova BiH, prilikom granične kontrole, u periodu maj 2007.godine – novembar 2011.godine, evidentirala 81 osobu kojima je od strane navedenih organa doneseno rješenje o oduzimanju državljanstva Bosne i Hercegovine. Tom prilikom je privremeno oduzeto i prosljeđeno organima od kojih su izdati, 32 dokumenta Bosne i Hercegovine na dalje postupanje.

Federalno ministarstvo unutrašnjih poslova je dostavilo Državnoj Komisiji za reviziju odluka o naturalizaciji stranih državljana spise predmeta sa originalnom dokumentacijom za osobe koje su stekle državljanstvo BiH po osnovu naturalizacije u periodu od 06.04.1992.godine do 01.01.2006.godine. Međutim, u nadležnosti ovog ministarstva nije procedura protjerivanja osoba koje nisu na redovan i uobučajen način stekle državljanstvo Bosne i Hercegovine sa njene teritorije.

2. Služba za poslove sa strancima BiH, u cilju efikasnije kontrole kretanja i boravka stranaca u Bosni i Hercegovini, suprotstavljanja neregularnim migracijama kao i davanja punog doprinosa efikasnijem sigurnosnom sistemu u borbi protiv terorizma je prioritet dala kontinuiranom preduzimanju operativnih aktivnosti u prikupljanju operativnih saznanja i obavještajnih podataka o kretanju i boravku u BiH osoba interesantnih sa sigurnosnog aspekta (pripadnici vehabijskog i drugih radikalnih pokreta), njihovim kontaktima, mjestima okupljanja, vozilima koja koriste i drugim zanimljivostima.

Služba vrši pojačane preventivno-represivne aktivnosti na području Gornje Maoče i drugim područjima, gdje se na osnovu predhodno prikupljenih podataka osnovano pretpostavlja da se okupljaju osobe interesantne sa sigurnosnog aspekta (po potrebi u saradnji sa drugim sigurnosnim agencijama), te pojačan kontrolno-inspekcijski nadzor.

Kada je u pitanju Gornja Maoča, odobren privremeni boravak u BiH ima 8 osoba, od čega jedna državljanka Makedonije na osnovu braka sa državljaninom BiH, te 7 državljana Austrije bh porijekla (otac,majka i petoro djece).

Služba za poslove sa strancima BiH će i u narednom periodu kontinuirano nastaviti pojačan kontrolno-inspekcijski nadzor i operativni rad u cilju potpune kontrole kretanja i boravka stranaca na području Gornje Maoče, te će se sva prikupljena saznanja i informacije o osobama interesantnim sa sigurnosnog aspekta odmah razmijeniti sa Tužilaštvom BiH i sigurnosnim agencijama u BiH.

Policija Brčko Distrikta u mjestu Maoča u cijelosti provodi zakone Brčko Distrikta BiH koje je pod njezinom jurisdikcijom, dok Gornja Maoča pripada općini Srebrenik, odnosno Federaciji BiH, i u skladu s tim provode se zakoni Federacije Bosne i Hercegovine.